

Bosna i Hercegovina
Federacija Bosne i Hercegovine
Bosansko-podrinjski kanton Goražde
**ZAVOD ZDRAVSTVENOG OSIGURANJA BOSANSKO-PODRINJSKOG KANTONA
GORAŽDE**

Broj: 01-02-*94* /20
Goražde, 08.01.2020.godine

Na osnovu Odluke o utvrđivanju osnovnog paketa zdravstvenih prava ("Službene novine FBiH, broj: 21/09) i člana 27. Statuta Zavoda zdravstvenog osiguranja Bosansko-podrinjskog kantona Goražde ("Službene novine BPK-a, broj: 6/16), direktor Zavoda zdravstvenog osiguranja Bosansko-podrinjskog kantona Goražde, donosi:

**U P U T S T V O
o utvrđivanju prava osiguranih osoba na medicinsku rehabilitaciju kao nastavak bolničkog
liječenja, uvjetima i postupku za ostvarivanje tog prava**

I. OPĆE ODREDBE

Član 1.

Ovim Uputstvom se utvrđuje pravo osiguranih osoba na medicinsku rehabilitaciju kao nastavak bolničkog liječenja (u daljem tekstu: medicinska rehabilitacija), postupak i uvjeti pod kojima osigurane osobe u Zavodu zdravstvenog osiguranja Bosansko-podrinjskog kantona Goražde (u daljem tekstu: Zavod) ostvaruju pravo na medicinsku rehabilitaciju.

Član 2.

1. Osigurane osobe se mogu upućivati na medicinsku rehabilitaciju samo u slučajevima kada je takvo liječenje neophodno kao nastavak bolničkog liječenja na osnovu medicinskih indikacija:

- stanja iza hirurških intervencija na srcu (ugrađeni-by pass, srčane greške, operacija zalistaka i transplatacija srca, operacija na korjenu i luka aorte-torakalne)
- stanja iza operacije kuka, koljena, prijeloma kičme i operacijskih zahvata stabilizacijskog tipa kod spinalnih povreda,
- teža oštećenja perifernog i centralnog nervnog sistema za koja postoji egzaktan dokaz, odnosno: priložena sljedeća medicinska dokumentacija: **CT, MRI, EMNG i DINAMOMETRIJA.**
- ako je banjsko liječenje neophodno za procjenu radne sposobnosti po preporuci Instituta za medicinsko vještačenje,
- kongentalna oboljenja neuromišićnog sistema, a na prijedlog neuropsihijatra, ukoliko se očekuje djelimično ili znatno uspostavljanje funkcije oboljelog organa ili sistema organa.

2. Medicinska rehabilitacija se provodi stacionarno

3. Osigurana osoba se može uputiti na medicinsku rehabilitaciju samo jednom u toku kalendarske godine, a najviše do 14 dana.

Član 3.

Osigurane osobe se mogu upućivati na medicinsku rehabilitaciju samo u zdravstvene ustanove sa kojima je Zavod zaključio poseban ugovor o pružanju usluga.

Član 4.

Prijedlog za medicinsku rehabilitaciju daje ovlašteni doktor primarne zdravstvene zaštite na temelju otpusnice ili otpusnog pisma sa bolničkog liječenja i na osnovu nalaza odgovarajućeg specijaliste koji je vodio bolničko liječenje, a ovisi od težine oboljenja.

Član 5.

Otpusnica ili otpusno pismo sa bolničkog liječenja i nalaza odgovarajućih specijalista sa bolničkog liječenja moraju sadržavati preporuku za obavljanje medicinske rehabilitacije.

Član 6.

1. Uz prijedlog za medicinsku rehabilitaciju obavezno se prilaže sljedeća dokumentacija:

- otpusnica ili otpusno pismo nakon bolničkog liječenja,
- nalaz ljekara specijaliste fizijatra, neuropsihijatra ili ortopeda,

2. U medicinskoj dokumentaciji neophodnoj za odlučivanje, moraju postojati priloženi laboratorijski i drugi odgovarajući nalazi iz kojih se može sagledati vrsta i intenzitet oboljenja, odnosno vrijeme i uzrok povređivanja.

3. Ukoliko ovih nalaza nema, neophodno ih je pribaviti i priložiti uz prijedlog.

4. Dopunski nalazi ne mogu biti ranijeg datuma od dana završenog liječenja.

Član 7.

Prijedlog za medicinsku rehabilitaciju iz člana 4. ovog Uputstva podnosi se na protokol Zavoda zdravstvenog osiguranja Bosansko-podrinjskog kantona Goražde, 1. Slavna višegradska brigada br.1 Goražde, Komisiji za liječenje van Kantona (u daljem tekstu: Komisija za liječenje van Kantona), u roku od tri do šest mjeseci nakon završenog bolničkog liječenja tj. od dana otpusta iz bolnice.

Član 8.

Odredbe o neophodnosti bolničkog liječenja ne odnose se na osigurane osobe – djecu do 18 godina starosti, kao i za oboljele od dječije cerebralne paralize do 26 godina života.

Član 9.

1. Komisija za liječenje van Kantona utvrđuje potrebu za produženo bolničko liječenje – medicinsku rehabilitaciju osiguranoj osobi, na temelju prijedloga iz člana 4. i medicinske dokumentacije iz člana 6. ovog Uputstva.

2. Ista može u postupku utvrđivanja potrebe za produženo bolničko liječenje – medicinsku rehabilitaciju, ako utvrdi da je potrebno, tražiti da se dopuni i obnovi medicinska dokumentacija.

3. Komisija za liječenje van Kantona donosi Odluku o potrebi za produženo bolničko liječenje – medicinsku rehabilitaciju.

4. Komisija za liječenje van Kantona o potrebi za produženo bolničko liječenje medicinsku rehabilitaciju daje bez prisustva osigurane osobe, a iznimno, ukoliko je to potrebno može da pozove osiguranu osobu na pregled.

Član 10.

1. Komisija za liječenje van Kantona može odrediti pratioca za osiguranu osobu koja je upućena na stacionarnu medicinsku rehabilitaciju samo u sljedećim slučajevima:

- za djecu do 18 godina starosti,
- za slijepu osobu,
- za oboljele od dječje cerebralne paralize do 26 godina.

2. Preporuka za pratioca mora biti izdata od ovlaštenog doktora primarne zdravstvene zaštite.

Član 11.

Komisija za liječenje van Kantona na Odluci određuje zdravstvenu ustanovu iz člana 3. ovog Uputstva u kojoj će se sprovesti medicinska rehabilitacija i dužina trajanja te rehabilitacije.

Član 12.

Nezadovoljna stranka može uložiti Prigovor u roku od 15 /petnaest/ dana Upravnom odboru Zavoda zdravstvenog osiguranja Bosansko-podrinjskog kantona Goražde.

Komisija za prava osiguranika i kontrolu lijekova Zavoda je u obavezi da u roku od 15 dana od dana prijema prigovora da svoju Preporuku i mišljenje o potrebi za bolničko liječenje – medicinsku rehabilitaciju Upravnom odboru Zavoda, a Upravni odbor Zavoda je u obavezi da u roku od 30 dana od dana prijema prigovora donese Rješenje.

II. PRIJELAZNE I ZAVRŠNE ODREDBE

Član 13.

Izmjene i dopune ovog Uputstva vrše se na isti način i po postupku za njeno donošenje.

Član 14.

Danom stupanja na snagu ovog Uputstva prestaje da važi Uputstvo broj: 14-I-1767/18 od 25.05.2018.godine.

Član 15.

Ovo Uputstvo stupa na snagu danom donošenja.

